

STRADDE ROMANE

E antiche stradde,
passavan pe
San Pê d'Ænn-a?



di Ezio Baglini

Tutti san che, in Liguria, ancheu, a stradda SS1 a va da-i confin de Spezza a quelli de Vintimiggia; pe questo a risposta a parieva pe lògica “sci”. Ma pe l'Aurelia do tempo di Romani e cöse no son coscì ciæe. Da 'n punto de vista stòrico, saieva utile dâ 'na risposta perché a l'aggiuttieva a definì quande o l'à avuo origine o borgo de San Pê d'Ænn-a, dæto che ancon acheu no se ne sa un bello ninte, mentre pe Corniggen, Sestri, Pegi e Pontedeximo ne peu dâ 'na man l'etimologia di nommi. A San Pê d'Ænn-a, solo 'na stradda ch'a va da-o porto de Zena verso ponente ò verso nord, sciben ch'a passe de d'ato da Prementon, a prieva avei favorio l'insediamento de pastoî pöi vegnui stansiali òppure de gestî de 'na stassion pe pösâse; no l'é façile acapî perché sci Corniggen (da Cornelius, nomme romano), e no a San Pê d'Ænn-a visto ch'a l'é ciù vixinn-a a Zena, a quelli tempi serà inte miage de l'epoca e pòsto donde arrivava e mercansie da esportâ. Ma “no gh'é de preuve”.

Inte l'affrontâ stò tema, devo antiçipâ che son profondamente sconcertòu da-o fæto che, inta pratica, gh'é ben ben di studiosi che no credan che ghe fose 'na stradda romana e quindi dubitan de l'origine do borgo inte l'epoca romana: inte tutti i libbri ch'o lezuo, nisciun ne parla: comme s'o fose un problema into quæ siaieva megio no impantanâse.

Pe l'Aurelia l'é tutto ciæo, pe tutti i Storici, segge o tòcco da Romma a Luni segge l'uso ch'o l'èa prevalentemente militare. Pe quello secondario do commercio, za gh'é de discordanse dæto che i groschi traffeghi pe via de tæra avegnivan quæxi tütü a-o de la de l'Appenin mentre a-o de sâ l'ea prevalentemente l'uso da navigassion. Nasce coscì – quande se parla de Liguria – unn-a corrente de studiosi ch'a vedde a stradda Aurelia da Luni giâ

de d'ato a-i Appenin senza passâ inta nòstra region; 'n'atra ch'a l'accetta l'idea de 'na via de còsta, a despeto de tutte e difficultæ che van da-o Bracco a-e ligge da còsta, finn-a l'abandon perché a stradda a no l'ea necessaia pe-i traffeghi locali.

Pe no cazze in confuxon se deve aregordâ che de “Aurelia romana” ghe n'é stæta ciù de unn-a in epoche diverse, ognidunn-a rifæta de neuvo, e quindi unn-a differente da l'atra, perché o terren o rezzeiva mâ, pe-e frann-e, perché e gente andavan a stâ da 'n'atra parte e via discorrindo. Coscì, s'incomensa a descrivine unn-a adreitûa preromana, ma mitologica e quindi fruto da fantaxia, a quæ a ne informa che un sentê o gh'ea, ciammòu via Heraclea e legòu a-a leggenda de Ercole, ch'o vegniva da-e “Colonne de l'Atlantico” e o l'aiva attraversòu o territòio di Liguri pè andâ a Romma.

